

Գլխահարկ միաբանացն Հայոց եւ ժողովրդոցն Երուսաղէմի յառաջագոյն սահմանեալ էր տալ 1348 դահեկան, իսկ 'ի քանի ամաց հետէ Կուսակալք Դամասկոսի սահանջէին եւ առնուին 12,416 դահեկան. չկարացեալ տանել զծանրութիւնն զայն, ետուն նորոգել զհրովարտակն հարկին բաժանել զթուղթս ըստ առաջին սովորութեան միաբանաց եւ ժողովրդոց եւ ըստ մարդաթուի ժողովել ըզհարկն, զայս հրովարտակ ցուցեալ Քաղաքապետին աղաչեցին առնել ըստ հրամանի Արքային. իսկ նա ոչ կարացեալ առնել ինչ՝ գրեաց 'ի Դամասկոս, նոյնպէս եւ Հայք, առաքելով զպատճէն հրովարտակին. այլ Կուսակալն ոչ ընկալեալ զբանս հրովարտակին, գրեաց հրաման սաստիկ առ Քաղաքապետն անպատճառ առնուլ զսահմանեալ գումարն. եւ նորա բռնացեալ 'ի վերայ Հայոց էառ զայն անթերի, էառ նաեւ 650 դահեկան ծախս թղթարերի: Պատճառ այսմ զի հարկահանք ոչ բաժանէին զթուղթսն 'ի գիւղօրայս Պաղեստինոյ, յորս բնակին Լատինք եւ Յոյնք, եւ 'ի Հայոց եւ ոչ մի ոք՝ եւ զյաւելեալ թուղթսն արկանէին 'ի վերայ երկի վանօրէից, Յոյնք եւ Լատինք ոչ կրէին մնաս անտի. զի ժողովէին 'ի ժողովրդոց իւրեանց, բայց Հայք մնասէին, որոյ վասն գրեցին 'ի Կոստանդինուպօլիս բառնալ զծանրութիւնն զայն:

Գ Լ Ո Ւ Խ Լ Ը.

Հրամանագիրք Կուսակալին Դամասկոսի: Պահանջ եւ բռնութիւն նորին: Նենգութիւն Քաղաքապետին խորհրդով Յունաց: Ստիպումն Կուսակալին խանգարել զգործս Հայոց:

ԻԲԵՐԵԻ դարձաւ Կուսակալն 'ի Դամասկոս յուխտագնացութենէ իւրմէ, գրեաց առ Քաղաքապետն եւ առ Դատաւորն Երուսաղէմի հարկեցուցիչ բանիւ գրել եւ ծանուցանել ինքեան զոր միանգամ արարեալ էին յԵրուսաղէմ 'ի բացակայութեան իւրում: